

# **Cronica : il millenari della claustra de Nossadunnaun**

Autor(en): **Gadola, Guglielm**

Objekttyp: **Article**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **9 (1935)**

PDF erstellt am: **27.07.2024**

Persistenter Link: <https://doi.org/10.5169/seals-881253>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

---

---

# Cronica

## Il millenari della claustra de Nossadunnaun

Vulesse il cronist de 1934 nudar tut ils evenements historics de muntada, sche dess quei in cudisch gries, sco quel dils Evangelis. L'istoria de 1934 para a nus ded esser stermentusas caussas brutala e perquei abstrahein nus bugen de relatar lezs evenements.

Ord tut il curriu e passau lein nus prender neu mo in evenement, in tuttavia legreivel, che muossa a nus co ina instituziun religius-culturala ei vegnida sin ina vegliadetgna de 1000 onns, e quei malgrad tutta fleivlezia humana, malgrad schliats temps, malgrad crisas internas ed externas.

Quei evenement ei: il millenari della claustra de Nossadunnaun. Remarcabel! Buca mo la Svizzeria catolica ha priu part de quei legreivel giubileum, mo bein era ina part della Svizzeria protestanta. Quei ei daventau cun tut respect e renconuschientscha en fuorma de pelegrinadis, sco era entras artechels e studis en las gasettas e periodicas scientificas. E cun tutta raschun! Ina instituziun, che sa festivar siu melliavel onn de fundaziun sto senza fallir esser baghegiada sin bien fundament, sto esser fundada sils megliers princips per quest e l'auter mund. Pilver, aschia eis ei, e stat ei!

Il tierm, il pli stabel, che stat denter igl imperi roman decadent ed il temps medieval naschent, ei senza fallir la fundaziun digl uorden benedictin, entras Benedictus de Nursia. Fegl d'ina nobla familia romana christianisada, ha el capiu d'unir quei ch'era aunc bien e meriteivel de viver vid la cultura romana, cun il niev spért, cul spért de Christus, cun sia religiun e cultura. Bein educaus e gia baul madirs per las caussas de Diu e dil mund, ha il giuven roman bandunau la Roma decadenta per fundar a Subiaco e Monte Cassino, ina instituziun, che porti vido els pievels della nov'Europa la cardientscha e cultura de Christus. Ina veglia canzun romontscha de 1690, pareglia cun raschun igl uorden de s. Benedetg cun ina plonta de profundas ragischs, che porta ils megliers fretgs:

„Uss ein pli che melli onns passai  
Sin quest pumer che frestgs ein stai,  
E sco ils cudischs scrivan,  
Sut siu mussar, intruidar,  
Aunc oz bia pievels vivan.

---

Igl uorden sogn ch'el ha plantau,  
Per il mund ha el purtau,  
Da di en di el ei carschius,  
Igl Orient, igl Occident,  
Sut sia regla ei vegnius . . .

Quels plaids valan aunc oz per tut las claustras benedictinas, mo spezialmein per la ven. claustra de Nossadunnaun, che ha giu la ventira de festivar siu melliavel onn de naschientscha. Melli onns! Ina pulita uriala! Tgei instituziuns, tgei stadis san mussar si e fa valer ina tala vegliadetgna e tradiziun ed el medem temps far attents il mund sin lur cumplein dretg d'existenza? Sco tier nies eremit s. Sigisbert, eis ei era stau a N. in eremit, che ha sanctificau il sulom sil qual la claustra ei vegnida eregida pli tard, numnadamein: Meinrad de Hohenzollern. Igl onn 828 compara igl eremit Meinrad sil cuolm Etzel, sin in cuolm, da lezzas uras aunc curclaus cun uaul e baghegia leu in caplut per Niessegner ed ina tegia per el. Sin in cuolm de semeglianta biala vesta, eis ei secapescha buc iu ditg, ch'ins ha engartau igl eremit — ed il pievel ha entschiet a visitar el, gl'emprem mo enqualin, cul temps denton entiras roschas; tuts culla supplica, ch'el intercedi per els tier Diu e ses sogns. Sias oraziuns per ils auters vegnevan exaudidas e per quei carteva il pievel, el seigi in sogn e venerava er'el per in tal. Quei ha displaschiu ad el e per quei s'el fugius pli lunsch viden egl uaul, leu nua che stat oz la ven. claustra de Nossadunnaun. Mo era leu ha el buca saviu sezuppar peradina. Ins ha encuretg ed anflau el e dapi lu ha el continuau de dar plaid e cussegl e quei a rehs e paupers. Ils rehs devan ad el beinqual schenghetg, ch'el prendeva per dar als paupers. Sin ina tala buna mana han ualti carteivel era ses dus assassins spiculau, cura ch'els ein ruts en sia tegia, ils 21 de schaner 861, e sturniu el. Quels dus schanis ein denton secuglienai malamein.

Igl uoppen de N. porta dus tgapers sin funs mellen. Quella enzenna ei de metter en combinaziun culla legenda de s. Meinrad, che raquenta: Meinrad hagi giu dus tgapers dumias cun el e quels seigien dai suenter als assassins tochen giu spel lag de Turitg. Entras smanis tut apartis, hagian ils tgapers saviu dar d'entellir, ch'ei seigi buca tut schuber cun ils dus fugitivs. Ins ha tenu a ferm els, la fin finala han ei schau valer lur scrocheria ed ein vegni mes vid la furtga. Quella legenda san ins crer ni schar star; jeu creigel ella, pertgei che tgapers eran gia dal temps de s. Benedetg ils utschals ils pli preferi dil fundatur digl uorden e quella carezia per quels prudents utschals ei lu naturalmein er'ida vi sin bia paders de pli tard. Remarcabel! Aunc oz aud'ins a schend il pievel de Mustér „tgaper“ per pader; secapescha senza vuler far beffas ni gomias. — Era quella observaziun auda en quei capetel! —

---

Item, propi in marter ei s. Meinrad buca staus; el ei buca morts directamein per sia cardientscha. El ei sulettamein daventaus in' unfrenda de sia buontad, ch'ei vegnida surduvrada sin tala turpigiusa moda e maniera. Gest perquei eis el in exempel per nies temps, ch'ei en sesez aschi paupers en buontad, aschi rehs en disfidonza ed aschi rachers culla carezia.

Meinrad ei vegnius satraus egl uaul de N. sper sia tegia ed il pievel ha pertgirau quella fossa cun gronda veneraziun. Essend M. staus in „de“, in niebel, — e franc era in sogn — ei la fama de sia mort en cuort penetra da lunsch suls confins de nossa tiara vidó.

E sco i va enqualga! Exempels tilan. Ils buns cunzun. Tschunconta onns suenter la mort de Meinrad ei il prevost de Strassburg seresolvius de seretret egl uaul della Sihl, per viver la medema veta sco M. Il medem han aunc auters eremits fatg. Il center de quella veta retratga fuva secapescha la fossa dil sogn. Quels eremits vivevan denton aunc senza regla.

Mo igl onn 934 — pia exact avon melli onns — ha Eberhard slargiau la tegia de Meinrad tier ina claustra, tenor igl exempel de s. Benedetg, che veva medemamein rimnau ils eremits de siu contuorn, epi fundau las claustras de Subiaco e Monte Cassino.

Alla claustra ch'ei vegnida eregida sur la fossa de s. Meinrad, ha el dau il num „Eremitas“, che sedi sin tudestg: Einsiedeln e che di bunamein il medem sco Desertina, ni sco quels dil „desiert“ q. v. d. ils romontschs schevan, suenter che s. Ursicin ha giu baghegiu in „monasterium“: Mustér. Ils emprems decennis suenter la fundaziun ha il ver spért regiu a Nossadunnaun e schizun giu bun'influenza sillas claustras benedictinas della Germania meridionala. Denton ei lu, circa entuorn gl'onn 1000, la claustra de N. vegnida reha e favorida dals pussents de quest mund e quei ha fatg meins bein al ver spért claustral. Gie, els ein i aschi lunsch, ch'ei prendevan si mo rehs e nobels sco paders ed aschia han els snegau en in punct principal la regla de s. Benedetg, che vul ch'ei vegni fatg negina differenza denter niebel e nunniebel, denter reh e pauper. La lavur manuala han lu quels „signurs paders“ capeivlmein schau orda maun a fumegls, essend ch'els vevan de far uonda mo cull'administraziun, daventond bunamein gl'entir cantun Sviz lur pervenda. Lur ugaus fuvan da gliezs temps ils Habsburgers, umens plitost prepotents, che targevan buc en vons, cura ch'ei vevan de far enzatgei cun la vischnaunca dils libers de Sviz. De capir, ch'ei ha buca muncau dispettas e sbarradas, oravon tut pertenenet dretgs de pastira, ded alp e pervia dellas schétgas. Quellas rabantschas han cuzzau mo 250 onns circa e beinenqual gadas eis ei schabegiau, ch'ils libers han tarschanau e burschanau ils paders buca hanau. Probabel eran ils libers de Sviz buca persuls la cuolpa, pertgei che per far dispetta drov'ei per ordinari duas partidas e ton di a nus era l'istoria, che quels paders de gliezs temps erien pli „signurs“ che „paders“.

---

Culla svilupaziun politica della giuvna Confederaziun, ei il pign principat abazial de N. vegnius tschinclaus dellas Ligias Svizzeras ed ha allura per motivs politics encuretg ed anflau in tal confederau en Turitg. E cun Turitg ha lu N. tenu ferm e bein tochen tiella reformaziun. Da cheu deriv' ei, ch'igl avat de Nossadunnaun ei aunc oz burgheis d'honor dil marcau de Turitg. Prendend N. si da gliez temps mo nobels sco muntgs, eis ei de capir, che la familia claustrala era savens fetg pintga, gie ei ha dau temps, ch'ell'era bunamein sin murir. Secapescha senza paders saveva la claustra buca mantener ina scola da lezzas uras. Gnanc per las pleivs, che la claustra veva de procurar, vev' ella glied uonda e perquei stuevan ei pladir aschi numnai „Leutpriester“, che vul dir exact sin romontsch: ple v o n s. Era Duri Zuingli ei staus in de quels e naven da leu eis el vegniuns elegius plevon dil dom de Turitg, il pli probabel per motiv che N. veva bunas relaziuns cun Turitg. Cura che quel ha midau cardientscha, ha era in pader de leu suondau el. Da gliez temps eran ei mo 5 paders en claustra. — Il pli interessant eis ei, ch'ins sa aunc oz leger en cudischs de scola, che Zuingli hagi midau cardientscha, sut influenza della miserabla veta, ch'ils paders menavien leu. Quei ei schullas e flausas, essend che Z. ei gia vegnius da Glaruna a N. cullas ideas fundamentalas de sia nova religiun. —

Ei fuss denton tuttina stau pusseivel, che la claustra culs paucs paders fissan vegni de priedi. Per evitar quei han ils libers de Sviz mes la tappa sil convent e sfurzau atras, che la claustra stoppi era prender si umens ord il pievel sco muntgs e buca mo quels de nobla schlatta. Mo per francar pli bein lur politica, han els sez elegiu 1526 in avat, Ludovic Blarer, in pader de s. Gagl, entras ils umens de cumin e scret avon a quel, co el hagi de reger en claustra. — Il medem ei daventau a Mustér 1536, cura che avat Martin Winkler ed aunc 3 de sia pasta, han bandunau la claustra per vegnir de priedi. Era a M. han ins, exact silla medema moda e maniera, capiu de tener naven il niev moviment, che havess senza fallir sgurdinau e sclavinau la veglia claustra de s. Ursicin, baghegiada sulla fossa de s. Placi e s. Sigisbert.

Cun quella fatga ha ei dau ina viulta per omisduas claustras e quei en in senn il pli favoreivel, ch'ins sa patertgar. Naven ded ussa van ils fegls de purs e mistergners en claustra. Nova veta vegn a strada en omisduas claustras: a N. entras igl avat Giohen Eichhorn ed a M. entras avat Christian de Castelberg, ch'ei omidus stai veritabels reformaturs de lur claustras.

L'emprema reforma ch'omisduas claustras han priu a mauns, ei stau l'erecziun de lur scolas. Tier quella fatschenta han surtut ils VII Cantuns catolics gidau, cunzun Mustér ha stuiu sefutar digl agid, sco ins sa leger els „Eidg. Abschiede, Bd. V. I. 1205 d. 889. Conferenz der VII katholischen Orte: Lucern 1615, 29 e 30 d'avrel: . . .“ und die Wiederherstellung der Schule zu

---

Diesentis, zum eigene, ihrer Sprache kundige Priester heranbilden zu können....

Entras quellas scolas novas, renovadas tenor ils vegls principis benedictins, ei aschibein a N. sco a M. entrau in niev spèrt en claustra, il spèrt della reforma catolica, che ha restaurau tut en Christus, en claustra sco ora el pievel. N. daventa aschia center religius e cultural della Svizzerza primitiva e M. il center relig. e cultural de nossa Surselva.

Dapi quels onns, q. v. d. dapi l'entschatta dil 17avel tschentaner, entscheyan era las bialas ed amicablas relaziuns denter la claustra de N. e quella de M., sco era ils peleginadis dil pievel romontsch ô Nossadunnaun.

Nus lein undrar cuortamein ina partida fatgs historics, che partegnan e pertuccan quellas relaziuns; quei ton pli, che nossas gasettas han buca fatg menziun ded ellas.

Igl onn 1617 ei la claustra de M. intrada ella congregaziun benedictina svizzerza, sin giavisch de N. ed ha cheutras survegniu grond sustegn moral e material de lezza e quei pliras gadas el cuors dils 3 tschentaners vargai.

Il pli monumental document per quellas relaziuns ei bein la baselgia de s. Martin a M. q. v. d., la baselgia claustrala. Quella ei vegnida baghegiada tenor ils plans dil muntg Caspar Moosbrugger de N. L'iniziativa e l'entschatta tier quella grond'ovra ha avat Adalbert II., in special amitg de N. dau; continuau e finiu a baghegiar (1712), ha lu Adalbert ils III de Funs e pagau ils deivets ha il capavel econom avat Gallus de Florin, de Tujetsch. Cun quel ei era la fluriziun della claustra stada alla fin. Il medem muntg, C. Moosbrugger, ha era fatg ils plans per la claustra de N. sco ella sepresenta oz e ch'ei vegnida baghegiada da 1704—1735.

Era tut ils auters moviments spirtals e culturals, che la claustra de M. fa atras dapi l'entschatta dil regiment d'avat Adalbert II, ein influenzai da N. Da leu vegn il spèrt barocc cun sia entira cultura en claustra a M. Ils emprems fastitgs havein nus igl onn 1657, lu 1658, 1693 ect. ect., nua che paders giuvens de M., che studegian a N. portan anavos cun els il teater religius, che ha viviu ed operau en claustra de M. entochen all'entschatta dil 19avel tschentaner ed or'el pievel entochen 1860 circa. (Pli bia sur quellas relaziuns mira: „Historia dil teater rom.“ Ischi XXII. e XXIII.) Era l'entschatta della stampa en la ven. claustra de M. (1685), ha giu siu sustegn da N., sco nus havein saviu mussar si quei en in studi spezial: „Die Buchdruckerei des Klosters Disentis 1685—1799“, el Bünd. Monatsbl. nr. 7 ed 8, 1934. N. ha numnadamein eregiu 1664 ina stupenta stampa, che ha stampau numerusas ovras e denter en talas de gronda valeta, entochen 1798; perfin cudischs romontschs, silmeins enzaconts, e quei dal temps della stampa veglia, cura che quella della cl. de M. era buca pli bein en uorden. Nus numnein cheu mo ils dus pli vegls:

1. 1792. La mira da bein morir: quei ei devoziuns per reverir e hondrar s. Joseph sco particular patron da morir bein. Nossa Donnaun 1792. Tetel  $\times$  Dedicaz. 7 p. La dedicaziun ei scretta da Jac. Antoni Condrau; il cudisch ha quel dedicau a Sia Sabientscha, sgr Landrechter Theod. de Castelberg, Mustér. 2 + 213 p. 120. Quei fuss la V. ediz. de quei cudisch!
2. 1796. Las pli bunas oraziuns, las qualas Sia Sointgiadat Pius ils VI. ha declarau & explicau. Translatau ord la Tudestg en Ramonsch Nossa Donnaun. 96 p. 120.

Lu astgein nus era buc emblidar ils gronds e numerus peleginadis a N., ch' ein vegni interpri de nies pievel el 17avel, 18avel e 19avel tschentaner. Onn per onn mavan ei entiras prozessiuns ô N. e Mustér, ch' era da gliez temps er in liug de peleginadi, steva lunsch anavos a Nossadunnaun. Gia il num romontsch: Nossadunnaun ei vegls; el ei vegnius construius ord: „Zu unsern lieben Frauen.“

Sco P. Placi a Spescha raquenta mavan cunzun ils Tujetschins bugen ô N. e quei il bia sul Krüzli; entiras prozessiuns e da tut temps. Per quei motiv stueva N. era procurar, ch' in de lur paders sappi romontsch, e vevan ei buca sez tals, sche tarmettevan ei in de lur conventuals a Mustér per empernder nies lungatg. Ina notizia pertenenent quella caussa ei fetg interessanta. Anno 1693, vegn il renomau P. Baseli Meyer de N. termess per quei intent a Mustér e dad el sedi ei; „Vor einigen Jahren sandte man ihn nach Disentis um für unsern Beichtstuhl die Bündnersprache zu erlernen, was er in kurzer Zeit derart fertig brachte, dass er eine Fundamentalgrammatik, diese Sprache leichter zu lehren, erfand. Bisher kannte man keine derartige Grammatik mit guten und unfehlbaren Regeln . . .“ (Mira: Geschichtsfreund, LXXIII. p. 163.)

Da sias uras hai jeu fatg catscha sin quella grammatica da Turitg anora ed encuretg ella en compagnia cun il rev. P. Archivar de N. in entir suentermiezdi el ravugl dils manscrets de leu; mo senza success. Mo ch' ella ha veramein existiu havein nus saviu constatar sin fundament de pliras fontaunas. Cun quella caschun havein nus era visitau la biblioteca della cl.; quella ei veramein grondiusa e cuntegn ina biala partida cudischs romontschs, denter auter exemplars fetg rars, complets e propers, sco sch' ei fussian vegni ier ord stampa. Il pli grond scazi romontsch, ch' ei a N. ei denton in manscret d' ina translaziun interlineara, ord il 13avel tschentaner. Ei setracta d' in cuort text sursilvan ord ina homilia, ch' ins ha d' in temps cartiu, ch' ella derivi de s. Augustin. Quell' entschatta d' ina translaziun ei probablamein vengnida fatga d' in conventual romontsch-sursilvan, ch' era de lezzas uras leu en claustra.

Quei ein mo zacontas notizias, che muossan a nus, co la claustra de N. ha manteniü cun la cl. de M. ed il pievel rom. bunas ed amicablas relaziuns. El decuors dils tschentaners ein ultra de quei era plirs romontschs intrai leu

---

en claustra e denter quels ha ei giu enzatgeinins, che han prestau buns survetschs, era alla claustra de Mustér.

Mo nus vulein trer alla cuorta e menzionar aunc zatgei factums historics ord il davos temps della cl. de N. — Anno 1798 ha la cl. de N. pitiu zun fetg muort l'invasiun franzosa. Ella ha stuiu sesbursar bravamein ed ei perfin vegnida sliigiada si dal directorium della Helvetica, mo buca per ditg, essend danovamein vegnida populada dals paders sin fundament dils acts dil regiment della Mediazium, anno 1803, aschia che quels paucs onns che la cl. existeva buca de dretg pli, han gnanc pudiu rumper la tradiziun, numdir il fil della veta. El decuors dil 19avel tschentaner, ha N. giu in tal sucuors de paders, ch'ella ei stada sfurzada de fundar pliras filialas ell'America. Els Stats Uni dell'America sesanflan oz 3 claustras fundadas da N. anora, ch'ei ussa sefatgas independentas. Dapi 1803—1848 han ils paders luvrau principalmein vid la scola ed introduciu 1848 il gymnasi cun 8 classas. En quels 131 onns, che la scola de N. exista, ha ella scolau 20000 intellectuals svizzers. Ils biars de quels ei vegni paders e spirituals.

Oz, en siu melliavel onn d'existenza, sesanfla la claustra en la pli biala fluriziun. Ella poseda 110 capitulars e 40 „bruders“, che stattan tuts sut la cana crutscha dil 54avel avat, Mgr. Jgnazi Staub, in scientificher ed historicher de renum. Dals capitulars funzioneschan 32 sco professers alla scola claustrala, 14 alla scola d'Ascona el Tessin, ina filiala della scola de N.; 16 ein plevons e caplons sin las 13 pervendas, che la cl. pastorescha, ed ils auters ein spirituals e confessurs en claustras de muniessas. Ina autra partida operescha sco magisters alla scola d'agricultura a Pfäfficon. Auters han de far cull'administraziun claustrala, era sin beins ordeiver N., sco on Thurgovia ed el Montafun. — Dallas grondas possessiuns en praus ed aclas dapi il temps miez, eis ei restau mo in sisavel pli. Coc e center de N. ei la scola. Era sco liug de peleginadi ha N. aunc adina si' attracziun, schebi ch'ei ha priu giu bia suenter l'uiara. L'economia, q. v. d. praus e biestga tonschan ual per il tener-casa della gronda familia claustrala, aunc quintau tier ils varga 300 scolars, ch'audan era tier quella. La qualitat de lur biestga ei numero 1, e fuva gia renomada el 13avel tschentaner.

Era ils cavals de N. ein aunc oz en bien criedi. Ils fraters seculars ein occupai; els surveschan en casa e baselgia e lavuran de mistregn. Els ein cunsunzs, calgers, serrers, scrinaris, picturs, sculpurs e ligiacudischs; ensumma tut quei ch'ei drova.

Possi la cl. de N. ed era sia sora, pli veglia a Mustér, semantener aunc inagada 1000 onns per bien e pró della religiun catolica e dil pievel svizzer.